

PROVINZIA AUTONÓMA DE BULSAN - SÜDTIROL

LEGE PROVINZIELA dl 14 de merz 2003, n. 4

Disposizioni sun la veles dl cunsëi provinziel dl ann 2003

L CUNSËI PROVINZIEL

à apurvà chësta lege,

l ne ie nia uní prejentà na dumanda
per n referendum

L PRESIDËNT DLA PROVINZIA

cunedësc

Articol 1

1. Per la vela dl cunsëi provinziel de Südtirol dl ann 2003 vëniel aplicà la normes nunziedes tla lege regiunela dl 8 d'agost 1983, n. 7 y mudazions suzessives, cumpatiblmënter cun la disposizioni aldò di comes tlo dessot.
2. L teritore dla provinzia de Bulsan reprejentea n sèul raion litel per la veles dl Cunsëi provinziel.
3. La cumpëida di cunselieres provinziei ie de trentecinch.
4. I azertamënc y la istrutories n cont dla ncumapatiblteies ududes danora dala leges ie de cumpetënza dla cumiscion de cunvalideda dl Cunsëi provinziel, che vën nciarieda a se dé ju limpea dal Presidënt/dala Presidënta dl Cunsëi. La cumiscion de cunvalideda ie numineda dal Presidënt/dala Presidënta dl Cunsëi provinziel, do avëi audi i/la mëinagrupa tl lim de tëmpe de chindesc dis dala prima senteda dl Cunsëi provinziel, y la ie metuda adum da n numer despër de cumëmbri, che ne daussa nia vester plu de set.
5. L decret de cunedida dla veles ie publicà tl Buletin Ufiziel dla Region nia plu de carantecin dis dan l di dla vela y ie publicà tres la plata Internet dla Provinzia autonóma de Bulsan; ai chemuns ti vën l decret mandà tres email.
6. Tl lim de tëmpe de cin dis do la publicazion dl decret de cunedida dla vela vëniel custitui l ufize litel zentrel.
7. L ufize litel zentrel ie metù adum da n magistrat/na magistrata dl Tribunal Aministratif Regiunel – sezion autonóma de Bulsan y da n magistrat/na magistrata dla Chëurt di conc – sezion autonóma de Bulsan.
8. I cumpunënc/la cumpuntëntes dl ufize litel zentrel vën crisc/crisses ora per urt, danter trëi prupostes cun trëi inuemes l'una; chësta prupostes vën fates dai Presidënc/dala Presidëntes respetivamënter dl Tribunal y dai Presidënc/dala Presidëntes dla sezions autonómes nunziedes dessëura. L Diretëur/la Diretëura dla Repartizion Servijes zentrei dl' Aministrazion provinziela chir ora per urt danter uni una de chësta prupostes n cumëmber efetif y n cumëmber suplënt per l ufize litel zentrel. I/la cumpunëntes ndividuedes a chësta maniera litea n si Presidënt/na si Presidënta y n Vizepresidënt/na Vizepresidënta.
9. La funziions de secretariat dl ufize litel zentrel vën dejëutes dala Repartizion provinziela Servijes zentrei.

10. L ufize litel zentrel mët oradechël a jì uni outra sort de scumenciadiva che possa purté pro a dejëujer bën si funzioms y lëura cun la mascima tresudënza y zënza parzialità defin.
11. Ai cumëmbri dl ufize litel zentrel ti spieta la ndeniteies ududes danora dala lege provinziela dl 19 de merz 1991, n. 6 per la cumiscions cun relevanza oradecà.
12. I partitic o la grupes politiches urganisedes dà ju pra la Repartizion provinziela Servijes zentrei, per l ufize litel zentrel, i simbui de lista cun chëi che i uel se defrenzië dal'otra listes. De chisc simbui muessel unì dat ju trëi ejemplares y chël ntan l orar de servisc, ma nia dan l carantcaterejim y nia do l caranttrëiejim di dan chël dla vela zënza cumpedé i dis de festa y chëi dan la festa.
13. La listes di candidac y dla candidates ti vën prejentedes al ufize litel zentrel pra la Repartizion provinziela Servijes Zentrei danter l trëntcaterejim di y la dodesc da mesdi dl trëntunejim di dan chël dla vela, ora che n i dis de festa y n chëi dan la festa, y te uni cajo ntan l orar de servisc.
14. Per la prentazion dla listes di partitic o dla grupes politiches che à prejentà candidatures cun n si simbol de lista pra l'ultima vela regiunela y che à davanià almanco una na sënta tl cunsëi, ne iel debujën de deguna sotscrizion.
15. Tl lim de tëmپ nchin n l di do dla destumënza dl tiermul nunzià tl coma 13 tòl l ufize litel zentrel la dezijion n cont dla listes di candidac y dla candidates y ti fej al savëi a chëi/chëles che à prejentà la listes, ciun candidac/ciuna candidates y ciuna listes che ie unides lascedes pro.
16. La zedules de vela y i boi dla sezions vën metui a disposizion dala Repartizion provinziela Servijes Zentrei.
17. Per uni sezion numinea l ambolt/l'ambolta n ufize litel metù adum dal Presidënt/dala Presidënta, da trëi cumpëidaujes – de chisc/chëstes sëurantòl chël/chëla, che giata la ncëria dal Presidënt/dala Presidënta, la funzion de n Vizepresidënt/na Vizepresidënta – y da n scrivane/na scrivana. Sce l ie, tla zirconscrizion dl ufize litel de sezion, spediei y cëses de cura cun manco de 100 liec, ie l ufize litel metù adum dal Presidënt/dala Presidënta, da cater cumpëidaujes y dal scrivane/dala scrivana.
18. I/la cumpëidaujes y l scrivane/la scrivana dl ufize litel de sezion vën crisc ora per urt aldò dla manieres ududes danora dal coma 21, danter la persones che à dejëut la ublianza scolastica.
19. L Presidënt/la Presidënta dl ufize litel de sezion vën crisc/crissa ora per urt aldò dla manieres ududes danora tl coma 21 danter la persones che:
 - a) à la rejon de lité pra la veles dl cunsëi provinziel,
 - b) à almanco l diplom de maduranza de na scola de istruzion segondera,
 - c) à n atestat d'azertamënt dla cunescënza dla rujenedes tudëscia y taliana aldò dl decret dl Presidënt dla Republica dl 26 de lugio 1976, n. 752 y mudazions suzessives,
 - d) à, sce l se trata di chemuns ladins, l atestat d'azertamënt dla cunescënza dla rujeneda ladina aldò dl decret dl Presidënt dla Republica dl 26 de lugio, n. 752 y mudazions suzessives,
 - e) à la cunescënzes fundamenteles tl ciamp dla nformatica.
20. La funzioms de Presidënt/Presidënta, de cumpëidaujes y de scrivane/scrivana ne possa nia uni dejëutes da:
 - a) chiche ie de servisc pra la Forzes armedes,
 - b) dutores d'ufize y dutores de basa,
 - c) secreteres de chemun y dependënc/dependëntes di chemuns cumandei/cumandedes a vester de servisc pra i ufizies litei cumenei,
 - d) candidac/candidates ala veles dl cunsëi provinziel.

21. Danter l vintcinejim y l vintcaterejim di dan la veles dejëuj l Presidënt/la Presidënta dl Ufize litel cumenel chësta pruzedures te na senteda publica, che ie unida cunedida doi dis dant cun n placat sun tofla de chemun, n prejënza di reprejantanc/dla reprejantantes de lista dla prima sezion dl chemun, sce desinie/desiniedes:
 - a) l/la chir ora per uni sezion, trajan ora per urt, l Presidënt/la Presidënta, l scrivan/la scrivana y tan de cumpëidaujes coche debujën.
 - b) l/la mët su na graduatoria de Presidënc/Presidëntes, scrivans/scrivanes y cumpëidaujes che vën crisc/crisses ora per urt, a na moda da pudëi, tl cajo de renunzia o de mpedimënt, remplazé tl ordenn de estrazion la persones crisses ora aldò dl pustom a).
22. Sce la cumpëida dla persones crisses ora aldò dl coma 21 ne ie nia assé, chir l Presidënt/la Presidënta dl ufize litel cumenel mo n iede ora n valguna persones danter chëles scrites ite tla listes liteles, les trajan ora per urt.
23. L ambolt/l'ambolta ti fej al savëi ala persones crisses ora tan tosc che la va y al plu tert l chindescejim di dan la veles, che les ie unides numinedes.
24. Uni sort de mpedimënc grieves per dejëujer la ncëria muessa unì fac al savëi tl lim de 48 ëura dala nutificazion dla nomina al ambolt/al'ambolta, che se cruzia de remplazé la persona mpedida cun i/la litadëures dla graduatoria aldò dl coma 21, pustom b); dla nomina vën la persones nteressedes nfermedes almanco trëi dis dan la veles.
25. L tratamënt economich di cumëmbri dl ufize litel curespuend a chël che ie udù danora per la veles dla camera di deputac.
26. I inuemes di saudëies dla Forzes armedes y de chëi che fej pert di corps militermënter urganisei tl servisc dl Stat, sciche nce i inuemes de chëi che ie pra la polizai de Stat, che vën lascei pro a lité aldò dl articul 41 dla lege regiunela dl 8 d'agost 1983, n. 7 y mudazions suzessives, vën anutei jape dla listes liteles.
27. Do che la ujes ie unides cumpededes, cunedësc l Presidënt/la Presidënta dl ufize litel de sezion l resultat che l mët a protocol, y po se cruziel:
 - a) che l vënie njinià na busta n. 1, che cuntën la listes liteles dla sezion, l protocol, la tabela de cumpededa dla ujes, la zedules de vela cun la ujes valëivles, la zedules de vela nules, la zedules de vela blances, chëles cun ujes de lista o de preferënza nules o cunttestedes, unfat sce chëles cunttestedes ie ntant bele unides asseniedes o no, la zedules de vela danejedes y chëles che ti ie unides tëutes al litadëur/ala litadëura che ie unic mandei demez dala cabina o che se à parà a jì ite tla cabina. Oradechël ie te chësta medema busta duc i documënc n cont de cunttestazions y lamentanzes che ie unides prejentedes ntan i lëures de vela, i scric che reverda la nomina di reprejantanc/dla reprejantantes de lista, la sentënzes dla Chëurt d'Apel, i atestac dl ambolt/dla ambolta aldò dl articul 32 dl Decret dl Presidënt dla Republica dl 20 de merz 1967, n. 223 y mudazions suzessives, y i zertificac dl dutor/dla dutora,
 - b) che la busta n. 1 vënie segileda cun l bol dl ufize litel, cun si sotscrizion y chëla de almanco doi cumpëidaujes, y, do che i lëures de vela ie unic stluc ju, se cruziel che la vënie mandeda al ufize litel zentrel tres l'aministrazion cumenela locala, che cëla che la cunsenziazion vënie fata aslune, o a n'otra maniera, che ie da stabili dala Repartizion provinziela cumpetënta.
 - c) che l auter material che fova unì sëurandat per pudëi dejëujer i lëures de vela vënie metù tla busta n. 2 y mandà al ufize litel zentrel aldò dla manieres ududes danora pra l pustom b).
28. Tl protocol nunzià pra l coma 27, pustom a) vëniel descrit i lëures che ie unì dejëuc dal ufize litel de sezion; l cuntën te unì cajo chisc dac:
 - a) l di y l'ëura prezisa dla nluegeda dl ufize litel y i cuinuemes de si cumëmbri y chëi di reprejantanc/dla reprejantantes de lista.

- b) la cunstatazion dla cumpëida di/dla litadëures scric/scrites ite tla listes de sezion y dla persones lascedes pro a lité tla sezion aldò dl articul 40, coma 1, pustoms b), c) y d) dla lege regiunela dl 8 d'agost 1983, n. 7 cun mudazions suzessives.
 - c) la ndicazion dla cumpëida dla zedules de vela, che ie unides autentichedes dan l scumenciamënt dla vela o, n cajo, nta la vela.
 - d) la ndicazion di inuemes di litadëures/dla litadëures, che ie unides lascedes pro a lité aldò dl articul 46, coma 4 dla lege regiunela dl 8 d'agost 1983, n. 7 y mudazions.
 - e) la ndicazion di resultac dla cumpededa che ie da scri adum nsci:
 - 1) cumpëida de duta la persones litëntes,
 - 2) cumpëida de duta la zedules de vela cun la ujes valëivles, nce chëles cuntestedes ma asseniedes,
 - 3) cumpëida de duta la zedules de vela cun la ujes cuntestedes y nia asseniedes,
 - 4) cumpëida de duta la zedules de vela cun la ujes nules,
 - 5) cumpëida de duta la zedules de vela nules,
 - 6) cumpëida de duta la zedules de vela blances.
- I dac nunziei pra la zifra 1) vën tëuc ora dla lista litela de sezion y dala listes, ududes danora ti articuli 45, 46 y 47 dla lege regiunela dl 8 d'agost 1983, n. 7 y mudazions suzessives, che ie unides adurvedes per la veles, nta che i dac nunziei pra la zifres 2, 3, 4, 5 y 6 ie tëuc ora dla tabeles de cumpededa dla ujes, che ie pert ntegre la dl protocol,
- f) na descrizion curta de uni sort de fat curiëus, de uni sort de ntraunida, de uni cuntestazion o auter che ie suzedui nta i lëures de vela, sciche nce la ndicazion dla pruteses y retlamazions prejentedes al ufize y dla mesures tëutes dal Presidënt/dala Presidënta.
 - g) la listes dla njontes al protocol,
 - h) la ndicazion dl di y dl'ëura dla stlujura di lëures de vela,
 - i) jape, la sotscrizion de duc i cumëmbri dl ufize litel y di reprejantanc/dla reprejantantes de lista.

29. Ora che tla forma sun papier possa i dac nunziei ti comes 27 y 28 unì mandei al ufize litel zentrel nce tres posta eletronica aldò dla pruzedura stabilida dala Repartizion provinziela per i Servijes zentrei.

30. L muessa unì scrit n protocol de duc i lëures dl ufize litel zentrel cun chisc dac:

- a) l di y l'ëura prezisa dla nluegeda dl ufize litel y i cuinuemes de si cumëmbri y chëi di reprejantanc/dla reprejantantes de lista.
- b) la ndicazion di resultac dl'ejaminazion dla zedules de vela cuntestedes y nia asseniedes,
- c) la ndicazion dla cumpëida dla ujes de lista,
- d) la ndicazion dl numer dla sëntes che ti ie unides asseniedes a uni lista,
- e) la graduatoria dla candidates y di candidac te n orden decrescënt n cont dla cumpëida de ujes persuneles,
- f) la ndicazion dla candidates y di candidac che ie unic cunedii litei per uni lista,
- g) jape, la sotscrizion de duc i cumëmbri dl ufize litel.

31. Na copia dl protocol ti vën mandeda ala cumiscion de cunvalideda dl Cunsëi provinziel al fin dla ublianzes nunziedes tl coma 4.

32. L ufize litel zentrel ti comunichea ai conselieres litei la cunvenida y ti l fej riesc al savëi al Presidënt/ala Presidënta dla Provinzia, acioche l/la posse debota cunedi la nutizia al publich.

33. La spëises che vën a se l dé tres l'aplicazion de chësta lege ie a cëria dla Provinzia.

34. La spëises per njinië ite i ufizies litei, per mëter su la listes liteles de sezion y per l paiamënt dla ndeniteies che ti spieta ai cumëmbri dl ufize litel vën antizipedes dal chemun y rembursedes dala Provinzia tres la Repartizion Servijes zentrei.

35. Per seguré che l servisc de vela vënie dejëut regulermenter ti vëniel cunzedù ai chemuns n cuntribut determinà dala Jonta provinziela a una cun l Cunsorz di chemuns te na mesura curespundënta al numer dla persones scrites ite tla listes liteles.

Chësta lege ie da publiché tl Boletin Ufiziel dla Region. Uni un y uni una a chël/chëla che ti spieta, à da la respeté sciche lege provinziela y da la fé respeté.

Bulsan, 14 de merz 2003

L PRESIDÈNT DLA PROVINZIA
LUIS DURNWALDER

Anutazions

Avertimënt

L'anutazions publichedes a chësta maniera ie unides scrites aldò dl articol 29, comes 1 y 2 dla lege dl 22 de tober 1993, n. 17, cun l sël fin de fé ntënder mic la dispozions, a chëles che l vën fat referimënt. L valor y la fazion dla ates legislatives tlo reputedes ne muda nia.

Anutazions al articol 1

L test dla lege provinziela de 19 de merz 1991, n. 6 vën repurtà tlo dessot:

Cumpensazions per cumëmbri de cumiscions, cumiteies y d'otra grupes de lëur denuminedes cochemei, istituii pra l'Aministrazion provinziela de Südtirol.

Art. 1

1. Ai cumëmbri dla cumiscions d'ejam, che ne fej nia pert dl'Aministrazion provinziela y nce ai cumëmbri cherdei da dedora de cumiscions, cumiteies y d'otra grupes de lëur denuminedes cochemei, istituii pra l'Aministrazion provinziela o pra aziendes y organisms autonóms ma dependënc dala Provinzia, ti vën paieda na ndenità pausciala de 40.000 Lire al'ëura, sce si atività ie de relevanza oradecà. Chësta ndenità vën calceda uni ann da nuef dala Jonta provinziela tenian cont dl avané di custimënc dla vita aldò dl indesc ISTAT.
2. Na ndenità pausciala de 30.000 Lire per la prima doi ëures de senteda, o uni tëmp unfat tan curt, y de Lire 12.000 per uni ëura sëuraprò ti vën paieda ai cumëmbri – che ne ie nia dependënc dl'Aministrazion provinziela - de cumiscions, cumiteies y uni sort d'otra grupes de lëur denuminedes cochemei, sce si atività ie limiteda a na relevanza nterna.
3. La grupes de lëur nunziedes tl coma 1 vën determinedes cun deliberazion dla Jonta provinziela, che ie da prejenté ala Chëurt di conc per la registrazion.
4. Sce la Jonta provinziela deliberea la formazion de cumiscions, cumiteies y d'otra grupes de lëur denuminedes cochemei, y sce chëstes ne ie nia ududes danora dala lege o da n regulamënt, muessela, al fin dl'atribuzion dla ndeniteies nunziedes te chësc articul, dé sëura l di canche i lëures de chësta grupes de lëur fina via. Tl cajo che i tiernui ëssa da unì slungei iel debujën de na deliberazionpezifca.
5. Ai cumëmbri dla grupes de lëur nunziei ti comes 1, 2 y 4 che, per dejëujer si funzions, muessa jì nzaul d'auter che tla luegia, ulache i s'anconta normalmenter, ti spieta la medema ndenità ududa

danora per i dependënc provinziei canche i ie de servisc oradecà. Ai cumëmbri dla grupes de lëur, nunziei tl coma 1, che ne depënd nia dala Provinzia y che muessa, al fin de dejëujer si funzion, fé sëuraluesc spezifics, ti spieta, ora dla ndenità per l servisc oradecà, nce la ndenità nunzieda tl coma 1. I servijes oradecà y i sëuraluesc muessa unì autorisei esplizitamënter dala grupa de lëur. Ai cumëmbri dla grupes de lëur nunziei ti comes 1, 2 y 4 y tl articul 2, che ne depënd nia dal'Aministrazion provinziela y che ne ie nia residënc tl luech, te chël che l vën fat la sentedes, ti spieta oradechël n reimbursamënt dla spëises de viac per furné ala senteda tla mesura y ala cundizions valëivles per i dependënc provinziei.

6. I scrivans/la scrivanes dla grupes de lëur aldò di comes 1, 2 y 4 dà sëura tl protocol, sot a si respunsabltà, l scumenciamënt y la fin dla senteda. Uni senteda ne daussa nia duré plu de sies ëures.

Art.1/bis

1. Ai cumëmbri, che ne fej nia pert dl'Aministrazion provinziela, di cunsëies d'aministrazion de enc, de istituc y de aziendes cun urdinamënt autonóm, ma che depënd dal'Aministrazion provinziela, ti spieta la ndenità nunzieda tl articul 1, coma 1. Per i Presidënc/la Presidëntes, che ne fej nia pert dl'Aministrazion provinziela, di enc, di istituc y dl'aziendes cun urdinamënt autonóm, ma che depënd dal'Aministrazion provinziela, y ai cumëmbri che ne depënd nia dal'Aministrazion provinziela di collegs di revisores di conc de chisc enc, istituc y de chësta aziendes, determinea la Jonta provinziela na ndenità pausciala n basa ala somes ududes danora tl artcul 1, coma 2 tenian cont dla cumplessità y dla respunsabltà dla funzioms. Ai Presidënc/ala Presidëntes y ai cumëmbri di cunsëies d'aministrazion y di colegs di revisores di conc di enc, di istituc y dl'aziendes inant nunziei ti spieta l tratamënt economich dl servisc oradecà y l reimbursamënt per la spëises de viac tla mesura y ti lims nunziei tl articul 1, coma 5.

Art. 3

1. Per curi la spëises che se porta pro tl'atuazion de chësta lege, se nuzeran di mesuns udui danora tl capitul 12125 dla previjion dla spëisa dl bilanz 1991 y di mesuns curespundënc ti bilanc suzessives dla Provinzia.

L vën repurtà l test dl articul 40 dla lege regiunela dl 8 d'agost 1983, n. 7.

Art. 40 (Litadëures che daussa lité tla sezion)

1. Tla sezion à rejon de lité:
 - a) chi che ie scrit ite tla lista di/dla litadëures dla sezion;
 - b) chi che se prejentea cun na sentënza dla Chëurt d'Apel o cun n atestat dl ambolt/dl'ambolta relascià aldò dl articul 3 dla lege dl 7 de fauré 1979, n. 40 che l/la detlarëie litadëur/litadëura dl chemun;
 - c) L Presidënt/la Presidënta, i/la cumpëidaujes, l scrivàn/la scrivana dla sënta y i reprejentanc dla listes di candidac, sciche nce i reprejentanc y i ajënc dla Forza publica de servisc tl orden publich, sce i ie scric ite tla listes de vela de n chemun dla zircostrizion;
 - d) I candidac/la candidates
2. I/la litadëures aldò di pustoms a), c) y d) muessa te uni cajo prejenté l zertificat de vela y chëi/chëles aldò di pustoms b), c) y d) vën scric/scrites ite, sun ncëria dl Presidënt, jape dla lista dla sezion, y chësc vën anutà tl protocol.

L vën repurtà l test dl articul 41 dla lege regiunela dl 8 d'agost 1983, n. 7.

Art. 41

(Persones militeres che fej pert de corps urgnaisei militermënter y dla polizai de Stat)

1. La persones militeres che fej pert dla Forzes armedes y di corps urgnaisei militermënter al servisc dl Stat, sciche nce chèles che fej pert dla polizai de Stat vën lascedes pro a lité tl Chemun te chël che les ie per rejons de servisc, a cundizion che les ie scrites ite tla listes de vela de n Chemun dla zircostrizion litela respetiva.
2. Les possa eserzitè si dërt de lité te uni sezion litela, a njonta di/dla litadëures scric/scrites ite tla lista relativa y cun prezedënza, sce les mostra l zertificat de vela, y les vën anutedes te na lista njunteda.
3. Les ne daussa nia se prejenté tla sezions liteles cuncedes su o armedes.
4. Si iscrizion tla listes relatives vën fata sun ncëria dl Presidënt.

L vën repurtà l test dl articul 45 dla lege regiunela dl 8 d'agost 1983, n. 7.

Art. 45

(Sezions liteles te spediei y te cëses de cura cun almanco 200 liec)

1. Ti spediei y tla cëses de cura cun almanco 200 liec vën istituída per uni 500 liec o frazion de 500 na sezion litela, te chëla che la vela vën fata aldò dla normes valëivles.
2. I/la litadëures che litea tla sezions liteles de spedel vën scric/scrites ite tla listes de sezion canche i/les va a lité dal Presidënt/dala Presidënta dla sënta; pra la verifica dla listes, uni mez ann, ti possa unì asseniei ala sezions liteles de spedel chëi y chëla litadëures che fej pert dl personal de assistënza dl spedel, sce i/les s'l damanda.
3. Per abiné adum la ujes dla persones staziunedes che ne possa aldò dla minonga dla direzion sanitera nia jì tla cabina, vën aplichedes la disposizions nunziedes tl articul che vën do.

L vën repurtà l test dl articul 46 dla lege regiunela dl 8 d'agost 1983, n. 7.

Art. 46

(Sëntes spezieles te spediei y cëses de cura cun almanco 100 y nchin a 199 liec y te perjons y lueges de detenzion preventiva)

1. Per la sezions liteles, tla zircostrizion de chèles che l ie spediei y cëses de cura cun almanco 100 y nchin a 199 liec o perjons y lueges de detenzion y de custodia preventiva, vën la ujes di/dla litadëures che ie ilo abinedes adum ntan l'ëures de vela da na sënta speziela, metuda adum da n Presidënt/na Presidënta y da doi cumpëidaujes, numinei/numinedes tla manieres stabilides dala normes relatives a chësta nomines.
2. Chësta sënta speziela muessa unì custituída n l di dla vela adum cun la nluegeda dl Ufize litel de sezion.
3. Un di/una dla cumpëidaujes sëurantol la funziions de scrivan/scrivana.
4. Pra i lëures de vela possa vester lepro i reprejentanc/la reprejentantes de lista desinieci/desiniedes per chëla sezion litela, sce i/les s'l damanda.
5. L Presidënt/la Presidënta se cruzia che la vela vënie fata te na maniera liedia y sucrëta.

6. I inuemes di litadēures/dla litadēures vën scric ite te na lista aposta, che ie da njunté a chëla dla sezion.
7. I duvieres dla sënta, metuda su aldò de chësc articul, ie limitei a nia auter che ala abineda dla ujes dla persones staziunedes ti spediei y de chëles šaredes ite y fina via pernan che la zedules de vela litedes, abinedes adum te na busta, vën purtedes ala sezion litela per unì metudes debota tla urna destinada a cunteni la zedules de vela litedes, do che si cumpëida ie unida cunfrunteda cun chëla di/dla litadēures che ie scric/scrites ite tla lista aposta.
8. La remplazada dl Presidënt/dla Presidënta y di/dla cumpëidauges, che mancia o che ie eventualmënter mpedii, vën dejëuta aldò dla manieres ududes danora dala normes per l remplazamënt dl Presidënt/dla Presidënta y di cumëmbri dla sëntes liteles normales.
9. Sce la cumpëida di perjunieres te na luegia de detenzion ie majera de 500, spartësc la Cumiscion litela raionela o la Sotcumiscion litela raionela - sun pruposta dl ambolt/dl'ambolta, nchin l segundo di dan la vela, al fin de abiné adum la ujes tres la sënta speziela ududa danora da chësc articul - i perjunieres danter la sezion, tl raion de chëla che ie la luegia de detenzion, y n'otra sezion ujina.

L vën repurtà l test dl articul 47 dla lege regiunela dl 8 d'agost 1983, n. 7.

Art. 47

(Eserzize dla rejon de vela te spediei y cëses de cura cun manco de 100 lueges liet)

1. Canche la sënta vën custituida y do che n à audì la direzion sanitera, stabilësc l Presidënt/la Presidënta dla sezion litela, tla zircostrizion de chëla che l ie nluegià cëses de cura cun manco de 100 liec, l'ëures ntan chëles che la persones staziunedes ilo possa eserzité si rejon de vela te chëla lueges.
2. Ntan l'ëures fissedes, va l Presidënt/la Presidënta dla sezion tla lueges de cura acumpanià da un di/una dla cumpëidauges dla sënta, cris/crissa ora a cajo, dal scrivan/dala scrivana y cun la prejënza dla persones reprejentantes de lista, sce les ie unides desiniedes y s'l damanda, y abina adum la ujes dla persones staziunedes se cruzian che la esprescion dla usc vënie fata o te na cabina muvibla o tres n mesun adatà, acioche la esprescion de usc liedia y sucrëta sibe garantida.
3. I inuemes dla persones litadēures vën, canche les dà ju la usc, anutei dal Presidënt/dala Presidënta te na lista aposta da njunté a chëla dla sezion.
4. La zedules de vela litedes vën abinedes adum y tenides su dal Presidënt/dala Presidënta te na busta y les vën purtedes debota tla sezion litela y metudes tla urna dla zedules de vela litedes do che l ie unì cunfruntà sce la cumpëida dla zedules de vela curespuend ala cumpëida dla persones litadēures scrites ite tla lista ududa danora aposta.